

摘藻堂四庫全書薈要

史部

欽定四庫全書薈要卷七千七百八十六

史部

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷十六

武功四

康熙二十年辛酉正月丁巳

上諭貝子章泰等曰廣西大兵已入滇境貝子章泰等兵
宜乘機速行進剿今大兵秣馬貴陽已經月餘且鐵索
橋盤江最為要地提督桑額等既報逆賊欲據盤江貝

子章泰總督蔡毓榮等不躬親馳赴扼據要害撲滅賊寇止遣薩克察巴圖魯等率兵前往殊非事宜章泰等其親統大兵迅往勦賊平定滇中勿失機會

丙子

上諭兵部今譚洪黨羽俱已就戮萬縣諸地悉經收復將軍噶爾漢其簡選士馬疾赴重慶盡統貝子準達軍速定遵義副都統得爾德等兵亦聽調用萬縣地處狹隘難以飼馬可趨至重慶秣馬而進噶爾漢軍中効力有

年困乏無馬者悉令準達率還荊州至於夔州要地令提督徐治都率標兵暫駐防守總督哈占可率所屬兵馳赴敘州府與大兵協力前驅勦賊

十二月己亥以逆寇蕩平

詔諭天下曰朕纘承丕緒統御寰區仰惟

天地眷佑之庥

祖宗付託之重

聖祖母太皇太后慈訓之殷蚤夜孜孜勤求化理期於兵

革寢息海宇乂安不意逆賊吳三桂負國深恩倡為變
亂陰結奸黨同惡相援抗違詔令竊據疆土滇黔閩浙
楚蜀關隴兩粵豫章之間所在驛騷肆騁痛毒吳三桂
僭稱偽號逆焰彌滋負罪尤甚朕恭行天討分命六師
勦撫竝施德威互濟或繫頸於闕下或駢戮於師中擒
捕誅鋤以次收服乃吳三桂旣膺神殛逆孫吳世璠猶
復鳩張踞六詔之一隅延殘喘以拒命朕惟賊患一日
不除則民生一日不靖策厲將士屢趣師期於是虎旅

協心進逼城下賊衆計窮勢蹙通款軍門約日獻城允
渠授首師克之日市肆不擾邊境晏如捷書旣至上慰

郊

廟

社稷之靈下抒中外臣民之憤神人胥悅遐邇騰歡念自
變亂以來軍民荼苦如在水火披堅執銳卒歲靡寧行
齋居送千里相望被兵之地旣罹於鋒刃供億之衆復
困於徵輸朕憫恤民艱不忍輒加額賦間施權宜之令

用濟征繕之需意在除殘事非獲已而身處宮寢之內
外廛閭閻之依中夜屢興盱食不暇怒焉思治八載於
茲今羣逆削平疆圉底定悉剪歷年之蝨賊永消異日
之隱憂用是蕩滌煩苛維新庶政大沛寬和之澤冀臻
熙皞之風體覆載好生之德秋肅必繼以春溫法帝王
更化之模義正尤期於仁育誕告天下咸使聞知

康熙二十一年壬戌八月庚寅初鄂羅斯所屬羅
刹剗掠邊境

上遣副都統郎談公彭春等率兵往打虎兒索倫聲言捕
鹿以覘其情形將行

上諭之曰羅刹犯我黑龍江一帶侵擾虞人戕害居民昔
發兵進討未獲剪除歷年已久近聞蔓延益甚過牛滿
恒滾諸處至赫哲飛牙喀虞人住所殺掠不已爾等此
行除自京遣往叅領侍衛護軍外令畢力克圖等五台
吉率科爾沁兵百名寧古塔副都統薩布素等率烏喇
寧古塔兵八十名至打虎兒索倫一面遣人赴尼布潮

諭以捕鹿之故一面詳視陸路近遠沿黑龍江行圍徑薄雅克薩城下勘其居址形勢度羅刹斷不敢出戰若以食物來餽其受而量答之萬一出戰姑勿交鋒但率衆引還朕別有區畫爾等還時須詳視自黑龍江至額蘇里舟行水路及已至額蘇里其路直通寧古塔者更擇隨行之叅領侍衛同薩布素往視之

十二月庚子

上諭議政王大臣等曰據郎談等奏攻取羅刹甚易發兵

三千足矣朕意亦以為然第兵非善事宜暫停攻取調
烏喇寧古塔兵一千五百名竝置造船艦發紅衣礮烏
鎗及演習之人於黑龍江呼馬兒二處建立木城與之
對壘相機舉行所需軍糧取諸科爾沁十旗及席北烏
喇之官屯約可得一萬二千石可支三年且我兵一至
即行耕種不致匱乏黑龍江城距索倫村不遠五宿可
到其間設一驛俟我兵將至淨溪里烏喇令索倫接濟
牛羊甚有裨益如此則羅刹不得納我逋逃而彼之逋

逃者且絡繹來歸自不能久存矣其命寧古塔將軍巴海副都統薩布素統兵往駐黑龍江呼馬兒

康熙二十二年癸亥七月癸未

上諭戶部兵部海洋險遠風濤不測自明代以來賊寇盤踞島嶼出沒靡常為害已久本朝平定閩省逆賊鄭成功竄伏海島侵擾沿海一帶地方雖屢經勦殺未盡根株逆孽遁踞臺灣蠢爾遊魂尚恣窺伺自滇黔底定賊寇殄除獨茲海外鯨鯢猶梗王化必須用兵撲滅掃蕩

逆氛庶海隅安全民生樂業特命施琅為水師提督統
領舟師竝飭該督調度會商相機征勦今克取澎湖已
扼險要臺灣逆穴指日殲滅立見廓清凡進勦軍前所
需兵餉米折應用器械及修理船隻豫備物料各項錢
糧所關甚為緊要應差部院堂官一員前往會同督撫
速為料理不拘何項錢糧儘見在者准其動用毋致貽
悞

康熙二十四年乙丑正月癸未議政王大臣等請

敕直隸山東山西河南巡撫每省派熟習火器兵二百五十人並選賢能官各四員豫備火器送京師至日增發薩布素軍前協攻雅克薩城

上諭曰疏內不請發禁旅良是但直隸各省綠旗兵未歷戰陣且黑龍江火器甚多不須增用朕意選福建投誠善用藤牌官兵見在八旗及安插山東山西河南者五百人令臺灣投誠左都督何佑等率往薩布素一應咨題多屬支吾借端延滯度四月進兵不過刈取田禾事

必無成此皆遣發黑龍江狂悖之人從中沮議不欲成
事薩布素出身微賤高視若輩毋敢有違用兵所關甚
鉅宜周詳籌畫期於必克倘謀事草率復似明安達禮
等退兵則羅刹將益肆披猖矣當自京城選賢能大臣
一員統兵以行俟克取雅克薩之日班師又發盛京兵
五百人代黑龍江兵守城種地出征兵還亦令還盛京
種地事宜遣戶部大臣一員督理所云早熟之穀即內
地春麥今我兵亦多種春麥及大麥油麥霜降前六日

皆得收穫則不因師出而曠一年田功矣藤牌兵給馬
二千匹帶往盛京盛京各佐領亦派馬二千匹照舊制
嚴督飼秣候京城馬到更代北行至馬喇等所養馬皆
豫備於齊齊哈爾屯此間催趲月杪可到聞此路間有
缺水處不免貽悞今自盛京抵烏喇自烏喇經新設驛
站路直且近當從此徑抵黑龍江沿途馬匹或有倒斃
馬喇以所備者足數補送如此則我兵馬匹無虞矣藤
牌兵各帶礮彈或十圓或二十圓以行其餉銀兵月給

二兩官月給三兩又

諭議政王大臣等曰兵非善事不得已而用之向者羅剎
無故犯邊收我逋逃後漸越界而來擾害索倫赫哲飛
牙喀奇勒爾諸地不遑寧處剽劫人口搶擄村莊攘奪
貂皮肆惡多端是以屢遣人宣諭復移文來使羅剎竟
不報命反深入赫哲飛牙喀一帶擾害益甚爰發兵黑
龍江扼其來往之路羅剎又竊據如故不送還逋逃應
即剪滅今仰副

天心大兵逼臨雅克薩城姑再傳旨羅刹云前屢經遣人移文命爾撤回人衆以逋逃歸我數年不報反深入內地縱掠民間子女構亂不休乃發兵截爾等路招撫恒滾諸地羅刹赦而不誅因爾等仍不去雅克薩特遣勁旅徂征以此兵威何難滅爾但率土之民朕無不惻然垂憫欲其得所故不忍遽加殲除反覆告誡爾等欲相安無事可速回雅庫於彼為界捕貂收賦毋復入內地構亂歸我逋逃我亦歸爾逃來之羅刹果爾則界上得

以貿易彼此寧居兵戈不興倘執迷不悟仍然拒命大
兵必攻破雅克薩城殲除爾衆矣如此宣諭後羅刹果
回雅庫為界即駐師於黑龍江設斥堠於雅克薩令疆
圉帖然否則大兵酌量進止不如此宣諭今縱克取雅
克薩城我進則彼退我退則彼進用兵無已邊民不安
爾等其詳議以聞

四月乙未

上諭議政王大臣等曰黑龍江兵於是月起行五月中旬

可至雅克薩城凡奏報軍機自雅克薩至額蘇里經黑龍江前來恐紆道遲延令理藩院侍郎明愛於杜爾伯特扎賴特派兵五百人竝索倫兵酌自墨勒根至雅克薩設驛奏報軍機庶免貽悞明愛往來覺察驛夫糧食匱乏以索倫所貯米支給黑龍江以內每驛原設二十人應核減一半併入蒙古若蒙古兵五百人過多再為核減索倫効力勤勞傳諭異日加恩以示鼓勵

六月癸巳

上諭諸王大臣等曰治國之道期於久安長治不可圖便
一時當承平無事朕每殫心籌畫即今征羅刹之役似
非甚要而所關甚鉅羅刹擾我黑龍江松花江一帶三
十餘年其所竊據距我朝發祥之地甚近不速加剪除
恐邊徼之民不獲寧息朕親政之後即留意於此細訪
其土地形勝道路遠近及人物性情以故酌定天時地
利運餉進兵機宜不徇衆見決意命將出師深入撻伐
然兵貴相機而動變化無窮惟恐諸將不遵朕指授致

失機宜今收復雅克薩地得遂初心至於撫綏外國在
使之心服不在震之以威近遣侍衛關保等往軍前諄
諭之曰兵凶器戰危事古人不得已用之朕以仁治天
下素不嗜殺爾其嚴諭將士毋違朕旨以我兵馬精強
器械堅利羅剎勢不能敵必獻地歸誠爾時勿殺一人
俾還故土宣朕柔遠至意茲一一奉行朕甚嘉焉又

諭曰朕思凡事必周詳審度方獲實效不可輕率從事向
者尚書明安達禮輕進至糧餉不繼將軍沙爾瑚達巴

海等失計半途而歸遂致羅剎驕恣而索倫奇勒爾鄂
羅春等心懷疑貳朕詢其失機情形一一詳計今始奏
功兵法云多算勝少算不勝詎可忽視且兵貴神速前
逆賊吳三桂等叛朕思岳州係湖廣門戶遣人指示速
戰始克岳州遂一面進取四川以分賊勢一面密諭大
將軍賴塔從廣西趨雲南於是諸省底定兵革休息然
亦在將軍等奮勉効力耳倘怠忽不奉行雖有良策亦
何益焉

壬寅

上諭大學士勒德洪學士麻爾圖圖納曰鄂羅斯入我邊
塞擾害鄂羅春索倫赫哲飛牙喀等處人民搶掠其家
口雖屢肆兇暴朕不忍遽興兵革故未即遣發大兵征
討數遣使曉諭鄂羅斯恃其遼遠仍復抗拒益侵伐我
邊鄙之人肆虐不止用是遣大兵直抵雅克薩之城彼
因困迫已甚而後歸降爰遵朕命宥其困而後降之罪
釋之使還大兵迅速征行破四十年盤踞之鄂羅斯於

數日之間獲雅克薩之城克奏厥績薩布素向來逗遛
不進兵之罪應概從寬免又雅齊納鄂山本獲罪發遣
之人其所互告之事仍行察議今進勦官兵殊屬勞苦
令伊等暫回吉林烏喇地方於盛京打虎兒之兵酌量
派往防守至雅克薩城雖已克取防禦決不可疎應於
何地永駐官兵彈壓此時即當定議著大學士勒德洪
學士麻爾圖圖納同郎談關保與議政王大臣等會議
具奏

十一月甲戌

上大閱兵於王家嶺先是

上諭兵部國家武備不可一日懈弛故事每歲必操練將士習試火礮爾部即傳諭八旗都統等整備軍容朕於十八日將親閱焉是日喀爾喀部落土謝圖汗子多爾濟厄爾德尼阿海台吉等以朝貢在京請於理藩院尚書阿喇尼轉奏曰臣等聞

皇上下大閱甲兵遠方之人幸逢盛典願一觀軍容

上曰從來撫綏萬邦在德教不在威武故兵不得已而用之今四海昇平偃兵不用然選練士卒簡閱軍器所以修武備昭法制也喀爾喀台吉旣請往觀可允其奏至是八旗都統各率所部將士以軍禮分列至王家嶺

上陞御座軍中吹螺發巨礮排鎗竝發前後相繼聲絡繹不絕又命將士發紅衣巨礮及諸火器一時盡發聲震天地巨礮所擊樹侯欄牆莫不應聲而倒時

阿海台吉及衆蒙古驚懼失色皆戰慄不止

上傳諭曰朕惟以寬仁撫馭欲使薄海乂安家給人足近者悅而遠者來此朕本懷也若兵為凶器非可輕試第念古來世際昇平不忘武備閱兵乃本朝舊制歲以為常無足驚懼也尋設布侯校射

上親射五發咸中次令諸王貝勒八旗善射者校射中的者甚衆阿海台吉等相顧驚訝曰

皇上真神射也

康熙二十五年丙寅七月乙巳

上諭兵部理藩院我兵圍困雅克薩城羅刹勢迫死守今時序漸寒自墨勒根至雅克薩所設蒙古驛馬冬月飼秣維艱其免索倫打虎兒今歲貢賦俾之飼秣並修整器械以備調用至蒙古每驛應設夫馬若干令明愛馬喇等定議移文索倫總管洪吉郎中滿丕等如數取用索倫打虎兒夫役與備養之馬又博鼎率往築城種地官兵內選二百人俱暫畱墨勒根亦候調用餘悉遣還

八月丁丑

上諭黑龍江將軍薩布素等曰今天時漸寒河流將結宜
每事籌畫豫為之備羅刹復來雅克薩城待援兵之至
且冀我兵於流澌時撤回耳目前我兵雖掘壕防禦至
隆冬冰合後船艦若何收藏馬匹若何飼秣敵兵來援
若何撲勦勿令入城爾等其詳加籌畫密以奏聞

康熙二十九年庚午正月辛丑

上諭內大臣等曰朕於國家政務竭力勤求是非自任從

不委於臣下即如遷移吳逆之事索額圖奏稱建議之人應請正法朕堅持獨斷必令遷移彼時十三省用兵數載天下大事皆朕一人獨任亦曾推諉爾等乎前年湖廣兵叛衆議紛紜朕謂此亦何難遂命綠旗兵丁即行勦滅又平定鄂羅斯之事滿漢諸臣咸謂彼距中國道遠難以成功朕謂此事斷不可中止即遣大臣前往導朕指示而行鄂羅斯隨即款服朕未嘗自伐其功但不似爾等稍有功績即有人代為表揚也朕乃萬姓之

主惟以兆庶未安此衷不能稍釋至於無知之人妄生
議論朕毫不介意也

四月甲子

上諭內大臣公舅舅佟國維等曰據阿南達奏言厄魯特
與拖多厄爾德尼戰頗被殺傷其襲席北推哈灘巴圖
爾時兩人共一騎有斬木為兵者且聞來侵昆都倫博
碩克圖而至今未到想已狼狽必有退回俄儂之勢阿
南達欲帶行轍竝禁軍前往相機征勦朕非不知禁軍

足以克敵但路遠艱於糧運朕前率察哈爾兵行獵見
其人材壯健皆思効力可選精銳六百左翼令阿要率
之右翼令博爾和代率之馬駝牛羊於八旗大場內派
出兵各攜五月糧再於漢軍每旗選章京一員領行礮
八門及礮手前往檄阿喇尼額赫納知之

五月癸丑

上諭鄂羅斯使人吉里古里伊法尼齊等曰噶爾丹迫於
內亂食盡無歸內向行劫今乃揚言會爾兵同侵喀爾

喀喀爾喀已歸順本朝倘悞信其言是負信誓而開兵
端也爾等可疾遣善馳者二人歸告尼布潮頭目令伊
遍諭鄂羅斯之衆

六月辛巳

上諭兵部噶爾丹追喀喀爾喀已進汎界朕將親往視師出
征諸王出喜峯口公蘇努等所領之軍隨朕行令諸王
先朕進發先檄知尚書阿喇尼等理藩院遣司官星馳
以往其令議政王大臣集議

癸未

上諭兵部噶爾丹已至烏爾會河軍宜速出其軍中無火
器者與前所發禁軍兵及盛京兵俱應增發令議政王
大臣速行詳議

甲申

上將出師先遣理藩院員外郎阿爾必特祐達賴齋
敕往諭噶爾丹

敕曰朕統御宇內懷柔萬邦惟願率土生民咸得其所相

與協和無分中外夫兵凶器戰危事互相讐怨無有已時非計也故遣尚書阿喇尼散秩大臣吳巴什扎薩克大喇嘛阿齊圖綽爾濟一等待衛阿南達傳諭令罷兵息戰爾回奏云聖主施仁撫育令共相協和以享康泰我亦與焉伏願指示安樂之策聞聖上將盡驅出喀爾喀之人不勝懼怖不敢以殺我弟多爾濟扎卜為憾所奏甚明今乃聞爾復興兵伐喀爾喀故遣尚書阿喇尼防境內之不靖者今烏朱穆秦遣使至爾所爾言中華

與我一道同軌我不敢犯界內地方而又闌入汎界掠
烏朱穆秦人畜是背前言而隳舊好也且朕前所遣伊
拉古克三胡土克圖等至今不歸爾誠何意耶今遣員
外郎阿爾必特祜達賴齎敕諭爾爾尚可以改圖爾旣
入邊我諸部王及貝勒台吉等行且興兵擊爾故亦遣
來使止之恤爾至矣其速給還所掠歸我使人爾其明
白回奏

七月庚寅朔

上諭兵部本朝自

列聖以來戰必勝攻必克所向無敵者皆以賞罰明法制嚴兵卒精銳器械堅利人思報國殫心奮勇之所致也今軍行其令各該都統以下察核軍實凡甲冑弓矢諸器械務令犀利堅好其盔甲俱繫號帶馬騾尾書旗分佐領姓名其行也視大纛整隊齊發有零星前後錯行及醉酒者該管官立拏懲責其止也各按旗分隊伍分列屯扎有前後錯亂者罪及該管大臣馬無印箭無名

各罰以銀給拏獲者竊取鞍轡什物馬匹者視其多寡
治罪失火者亦從重究懲官兵廝役所過百姓蒙古地
方毋騷擾毋搶掠毋踐踏有擅離營伍入村落山谷奪
人財物者軍法從事罪及本主及該管官軍士廝役逃
亡在汛界內立行察拏治罪如出汛界外該管大臣即
遣官兵窮追務獲立斬以徇如不能獲則將往追將卒
從重治罪其逃人之主及該管官一併嚴行察懲旣出
我境哨探斥堠務期嚴密如曠野交兵對陣見敵王貝

勒貝子公大臣不按次序攙越前進及見賊兵寡弱不復請令冒昧前進者有功不敘仍治以罪其進也須齊列緩轡按隊前行如自離其隊而附人後或自棄其伍而入別行或他人已入而獨留不進身死家沒及重責革罰分別治罪如整齊而進擊敗賊兵厥功維均勿以畧分先後致生爭競至彼不抗我軍而奔潰則選精兵良馬逐之列隊躡踪而進如前忽遇伏或賊兵有旁抄者則後隊接戰夫兵者所以討逆而安順也領軍大臣

果能嚴束其下不使良民受害朕不靳厚賞否則罰亦
無赦凱旋之日有以兵器私售蒙古者本人治罪竝及
該管官馬乃大軍急需須視水草善地小心護養起行
時則留將卒察遺失之馬視駿尾所繫字樣交還原主
如係疲馬則開明馬色數目交所在官司人民蒙古善
行牧養報知兵部如有匿而騎用及殺之棄之者治以
罪其遺失疲馬之人亦開明馬色報兵部存案恐官兵
未能遍知爾部其刊布曉諭之

壬辰

上諭理藩院額赫納軍從某汛界達阿喇尼所較為捷近
其諭阿喇尼等遣能員速往迎之兵力薄恐突遇敵兵
也阿喇尼所駐地如有可虞漸移入內謹防斥堠又聞
喀爾喀行劫驛馬其曉諭嚴禁之

癸巳安北大將軍和碩恭親王常寧奏臣旣出喜
峯口當由何道進兵

上曰視其道之近者往與大軍會其出古北口之兵糧儲

多爾等未會之際糧宜節省出邊後有助糗糧者聽助籍其姓名以聞所助牛羊俱收牧及時以散給之炎暑軍行恐人馬勞苦其令晝止夜行

丙申

上諭內大臣舅舅佟國維等曰京城大軍絡繹出邊阿霸垓阿霸哈納蘇尼特高齊忒等兵無所調用今不必赴尚書阿喇尼軍前著於各旗形勝之地駐扎嚴防喀爾喀新來之衆妄行

壬寅噶爾丹遣達爾漢格隆奏言喀爾喀吾讐也
因追彼闌入汎界向在

中華皇帝道法之中不敢妄行

上因賜來使筵宴賞賚令齎

敕歸諭之

敕曰據爾使人達爾漢格隆陳奏具見敬慎悃誠朕統御
天下重信義而賤欺誑前以七旗喀爾喀彼此構怨與
達賴喇嘛共議遣大臣諭和不意左翼興兵妄動朕弗

之直也後喀爾喀為爾所敗匍匐來歸朕念普濟衆生之意賜以米糧牲口所全活者無算喀爾喀何利於朕而施恩若是皆朕不忍生民之顛沛故耳是年出盟方分別七旗曲直昭雪扎薩克圖汗之事欲仍前設立右翼議未及定爾兵已至乘虛驟入褫守汎界者衣服出言不遜朕亦不深責六月二十五日遣員外郎阿爾必特祐等問其故而阿喇尼等在邊以爾公然闖入汎界守邊責重不能容忍遽與爾戰朕甚非之六月二十九

日復遣郎中滿丕齋敕諭爾及商南多爾濟歸取行糧而已豈有正事尚未議定即可言執土謝圖汗澤卜尊丹巴胡土克圖以昇爾乎此皆使臣設計脫身而為此言也爾謂與達賴喇嘛道法為一則當憐念衆生同心以安喀爾喀令七旗同享安樂以仰副朕意乃反肆殺戮拆人妻子離人骨肉闌入汎界掠及四佐領之人揆之道法可若是行乎恐達賴喇嘛未必使爾為此也西寧報至聞策妄阿喇布坦以爾罪告之達賴喇嘛將興

兵伐爾夫興兵非美事也朕且將與達賴喇嘛共議調和而聞爾已駐兵烏爾會河故朕遣和碩裕親王及皇子大臣量發滿兵而往非討爾也欲定議耳前者遣大臣往鄂羅斯議事亦發兵往議畢而回爾所夙知也為爾計其聽達賴喇嘛言罷兵息戰各享安樂既合衆心亦易畢事如仍以前事為辭妄行剗掠則隳敗名教自爾始矣

癸卯

上諭都統瓦代等曰據關保奏噶爾丹於六月二十七日
遣發其使人及我撥什庫次日潛師遁去班第蘇爾達
等遣人躡視之噶爾丹兵果已北去朕之欲幸此軍者
以躬近行間便指示也今噶爾丹雖退而喀爾喀方且
橫行剽掠驛遞及諸扎薩克馬牛衣服乘此大兵集會
朕乃親往視師以靖喀爾喀之肆橫俾知所畏忌事可
一舉而定也

辛亥

上諭裕親王福全等曰爾軍進止與哨探噶爾丹所在宜
不時報聞今朕與爾相距僅三百里而往來之信常遲
非軍機所宜也其不時做飭之

八月辛酉

上諭裕親王福全及參贊王大臣等曰卿等奏報大敗噶
爾丹疏初三日已到此皆

上天鑒臨

祖宗默佑諸王大臣盡心官兵効力之所致也朕聞之焚

香謝

天不勝欣悅此後當何以窮其根株平其餘黨孰籌始末
一舉永清勿留遺孽其詳議以聞

丁丑

上諭議政大臣等曰噶爾丹雖認罪立誓上書請降但人
殊狡詐難以深信我大兵撤後背盟妄行亦未可定且
諭噶爾丹敕內有厲兵秣馬見俱整備之語仍宜發兵
豫備萬一有悖叛之信則夕聞朝發即可撲滅若待有

變而後發兵緩不及事矣見在各佐領有喂肥馬匹著
每佐領派護軍七名甲兵五名六名整頓備之其即會
議尋議政大臣以豫備官兵人數啟奏派出

上諭曰此軍非為出征而派也以噶爾丹雖降而人殊狡
猾不可深信萬一叵測所以派出備之其以此故曉諭
官兵知之

康熙三十三年甲戌四月己卯

上令班第策旺諾爾布夸色俄齊爾杜喇爾覘噶爾丹情

狀

諭之曰爾等若往擒生口則起釁端矣姑探其動靜可也
惟以招撫和托輝特根敦戴青等為要爾至彼宣朕諭
旨曰朕念噶爾丹與汝逼近常恐為汝害汝當移近席
北推哈灘巴圖爾納木扎爾陀音阿里雅等遠設哨探
倘有警汝等同心併力而行於事乃有大濟此為汝等
慮也席北推哈灘巴圖爾等見在土喇游牧汝等不論
居何地朕無所嫌況噶爾丹事平之時喀爾喀通國仍

遣歸故土也爾等無兵如得消息可即歸來

七月癸酉

上諭領侍衛內大臣等曰尚書班第等疏言和托輝特根敦戴青遣人往探噶爾丹消息擒厄魯特色楞以回據供云噶爾丹於去年春冬間二次遣人窺根敦戴青所居處今年正月來於庫克朔東杭幾爾察克地方居住根敦戴青聞噶爾丹移營近彼前進遂亦向內移營於土喇之席北推哈灘巴圖爾處觀噶爾丹之前進情形

當是圖根敦戴青而來不遇則隨其踪跡而求之來至土喇一帶地方搶掠汎界之喀爾喀亦未可定今時會旣佳馬復肥壯可調寧夏歸化城及右衛之兵循克魯倫河於土喇等處往尋席北推哈灘巴圖爾探彼情形消息若果噶爾丹來近土喇擾害喀爾喀我軍有可乘之機將軍等相機而行倘我師未至之先彼已過而前進則從後襲之趙良棟諳習軍務卽談前往時可與之偕行令趙良棟率寧夏火器營兵二百人寧夏兵卽支

寧夏之米歸化城與右衛之兵即支湖灘河朔之米此時機會甚便斷不可失爾等與議政王大臣會議以聞
壬午兵部題建威將軍希佛請將大同綠旗兵三千令總兵官率之與臣等同行又鑲藍蒙古旗分察哈爾兵近殺虎口居住其八旗察哈爾俱接壤而居丁壯整齊秋高馬肥請將伊等前鋒護軍驍騎酌量派發時各旗遣至臣等軍前

上諭大學士等曰綠旗兵若多發往則其馬少且邊外地

方米糧何能運到朕前巡察邊外時曾帶古北口綠旗兵往沿途常賞賚食物贍養然去時猶可及觀其回時情形甚憊隨朕行走尚有苦累之處今希佛亦能如此賞給乎希佛每遇一事必生疑阻此番發往之滿洲兵已有八千有此兵力所向無敵將軍費揚古勲舊大臣今駐防歸化城衆皆稱贊軍士亦皆心服都統郎談邊外行走熟練於此事無不能辦者若又遣希佛往或致疑阻大事亦未可定此處關係甚大希佛著停其前往

右衛新駐兵丁令將軍希佛料理大同綠旗兵丁不必
多發著大同總兵官康調元親選五百名與將軍費揚
古一同前往至京城兵亦已預備察哈爾兵倘有緊要
差遣即與所備之兵一同調遣不必發往



大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷十六



總校官庶吉士臣張能照

校對官庶吉士臣何思鈞

校對官庶吉士臣戴心亨

謄錄監生臣劉垠

謄錄舉人臣孫潢

欽定四庫全書叢要

史部

聖祖仁皇帝聖訓卷十七

十八

詳校官編修臣繆晉



欽定四庫全書薈要卷七千七百八十七

史部

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷十七

武功五

康熙三十四年乙亥十月丙申

上諭議政大臣等曰傳諭沙木巴戴青墨爾根濟農值雨
雪時噶爾丹侵掠其疆界亦未可定宜簡發其兵并附
近喀爾喀台吉之兵於諸處防守遠置塘哨探聽消息

倘有噶爾丹之警敵勢寡弱量力可擊則以其兵擊之
若敵勢衆多則設殿後之兵向歸化城內地移營雖退
入內地亦不譴責也凡有動靜一面速報歸化城將軍
一面奏聞

十一月庚辰

上諭內大臣等曰用兵之道以賞罰為要今日大閱朕將
降敕以昭示勸懲敕曰本朝用兵以來所向無敵野戰
則勝攻城則克惟有弓矢劍戟為用自三逆叛後南方

皆水田賊人雖用火器相持而凡遇之敵靡不摧敗朕
以故洞悉特立火器製備鎗礮交發八旗由是我朝之
神威益震於四域矣今噶爾丹遊魂假息於喀爾喀左
近肆行竊掠朕欲一舉立殄是以整理諸路糧餉器械
熟計而行是師之舉與昔不同茲爾將卒廝役各當勉
力倘遇敵奏凱而還朕必大沛殊恩陣亡者除照常給
賜身價外護軍則廕一子為七品官食俸驍騎則廕一
子為八品官食俸如無子則照本身錢糧給其孀妻終

老所借公庫官銀另加寬卹倘違軍令勿得仍望如前
矜宥

甲申

上諭西路督運光祿寺卿辛寶內閣侍讀學士范承烈等
曰輓輸朔漠車輛甚為緊要爾等其會同山西巡撫動
支正項錢糧速行備造勿致累民輓車兵卒給與行糧
地方官有才具者任爾等選擇帶往其管兵官員與輓
車人等亦必擇精壯者用之

十二月甲辰

上諭兵部師出以律可奏膚功自我

太祖

太宗

世祖以至於今野戰必勝攻城必克所向無前雖士卒世受國恩捐軀報効實由我朝軍紀森嚴信賞必罰兼以兵馬精強器械整齊之所致也朕今次軍行特規酌舊制參以新謨爰著為令告我六師一大軍出征本都統

護軍統領副都統叅領等審視官兵甲冑弓矢暨一切軍中器用務期堅利兵之盔尾甲背及戰矢之榦各記名其上馬烙以印繫尾處繫小牌書旗分佐領姓氏以爲記號馬不烙印追銀二兩箭不書名追銀十兩給舉首之人一啓行時凡兵衆必各率行裝按旗隊以次前進不得零星散亂後先越走自出國門以至旋師當各遵守違者鞭責示警一在道毋離蠹毋酗酒毋誼譁毋叫呼不遵者該管官即行捕責一所過地方不得擾害

居民及蒙古部落如侵犯子女掠奪馬畜蹂躪田禾及擅離營伍入村莊山谷強取一物者兵丁廝役俱從重治罪其該管官及廝役之主一併議罪一邊境以內凡兵役在逃立刻緝拏依定例治罪出邊而逃該管大臣即發官兵務窮追捕以正軍法設追緝不獲往追人從重治罪伊主并該管官一併嚴處一下營務按旗列幕不密不疎如越旗亂次前後攙雜者將該管大臣官員分別治罪其兵役內有愆不畏法盜馬上零星諸物者

懲以鞭責盜馬匹及鞍轡者視盜賊多寡按律治罪一

出哨毋攜大纛各帶本旗顏色小旗遠距大營設哨勤
加巡視比暮則還就近地勿舉火勿攜帳一人一騎其
馬備鞍以待晝則近身牧放夜則刈芻拴喂設寇至探
明即飛報大營若無寇妄報與寇近不知以致傳報稽
遲者主將該汛坐哨官兵立刻正法軍前示衆一值夜
巡徼官兵必張弓束服袴鞬并解甲囊以備不可怠忽
無事人昏夜不得擅行行者必問如衣服器械有異即

行擒拏苟貪睡偷安或人數缺少該管大臣察出嚴治其罪一與寇相近管兵將軍大臣酌派前鋒叅領率兵往探務詳審賊情虛實地勢險易并嚴飭營中夜無燃火一對敵列陣時主將必度地據險寇或布野或結駱駝鹿角為營我軍分列行間指明某隊某旗當擊敵陣某處戰時鳴角進軍戰畢仍鳴角收兵官兵或棄其部伍混入他人部伍或軼出本陣往附他人尾後或逡巡觀望逗遛不進照所犯輕重正法籍沒鞭責革職至我

軍分陣進擊某旗對陣敵堅不動即發所備援兵助擊之又對面臨陣時王貝勒貝子公大臣官員或不依次誼聞擁入或見敵寡不請擅進此一次功不議仍以罪論一敵陣動搖我軍攻入當嚴禁官兵不得掠人畜財物如不遵軍法貪行攫取者重懲不貸一敵敗北即選兵馬追之隨派隊伍接踵繼進倘追兵墮其伏中或遇寇遊兵我後兵與之接戰前隊兵仍行追進一師旋日當嚴行禁止凡軍器不得售賣存留與諸蒙古違者從

重治罪該管官一併議處一駝馬為師行要需湏擇水草善地牧放夜則加意巡防起營時畱官兵於後收察遺失駝馬審其印烙牌記各交原主其疲乏者即於就近地方官或村莊居民或扎薩克蒙古處辨色登數交與飼養仍以其數報明兵部如有將遺失駝馬隱匿乘用或因其疲乏委棄宰殺者嚴治以罪令駝馬原主開明遺失疲乏駝馬顏色數目亦報兵部登記一軍糈關係綦重凡出征官兵須各計口按日支領攜帶倘不如

額查出即從重治罪一有職掌大臣官員原各有親隨兵卒不得復於大兵內抽取以分兵勢如委署人員及官之原無親隨兵卒者許各抽一名一大兵存駐處毋令閒惰每日較射磨礪器械所頒軍令不時宣諭令其詳悉夫兵者所以討逆安民朕不得已而用統兵大臣能體朕意嚴束屬下官兵於所過邊境內外不輕取一物使人民安堵如故奏凱日自行陞賞如縱官兵為非擾害生事者定加重處凡茲軍令應通行曉諭各路官

兵如傳示不到即將傳示之人以軍法從事爾部其以
朕諭與前南苑所降之旨一併刊頒俾各凜遵毋忽

是日

上諭議政大臣等曰凡綠旗兵卒內有從本陣前進超入
駱駝營鹿角營衆人接踵齊進殺敗敵寇者第一名優
陞千總其督戰之員優陞二級擢用至綠旗將弁內有
親身超入駱駝營鹿角營敗敵者優陞三級擢用著以
用印空劄頒發將軍提督總兵官凡綠旗官兵有顯著

勞績者即照所定職銜填注給與

康熙三十五年丙子正月甲戌

上欲親統大軍往征噶爾丹漢大學士九卿科道等疏稱
祈

皇上遣將授兵指示方畧停止

親征

上曰向年烏闌布通之役朕以策誘噶爾丹入距京師僅
七百里許大兵已經擊敗乃竟中賊計致噶爾丹遁走

彼時因朕躬違和未得親至其地失此機會至今猶以
為憾噶爾丹竄伏巴顏烏闌地方相距未甚遼遠以是
不憚勤勞親莅邊外相機行事此賊既滅則中外寧謐
可無他虞假使及今不除日後設防兵民益多擾累所
奏已知之

乙亥振武將軍孫思克奏言臣同尚書圖納公議
派陝西綠旗兵九千於二月初十日以内齊集甘
州養馬一月一同出邊但甘肅地方苦寒請候青

草發萌時出口再河西地方逼近蒙古應令提督
李林隆酌量帶兵駐扎甘州防守

上諭諸王大臣曰大將軍費揚古兵於二月二十日前後
進發將軍孫思克兵亦應令於二月二十日前後自寧
夏起程甘州肅州等處兵若調至寧夏路途遙遠其到
必遲見今寧夏有滿洲兵一千漢軍火器營兵五百應
再增以西安滿洲兵一千漢軍火器營兵五百以足三
千之數再寧夏榆林二總兵官標下綠旗兵共選派六

千即令該總兵官帶領同將軍博濟副都統阿南達等
於二月二十日前後自寧夏起程令將軍孫思克將伊
標兵酌量選帶速來寧夏如及期而至則一同進發倘
或不及可隨後踵進其滿洲漢軍兵丁馬匹未及喂肥
著該將軍總督等將存留滿洲漢軍并綠旗兵丁馬匹
內酌選肥健者更換付之其添給綠旗兵丁馬匹并運
米之駱駝馬騾俱令於各營及驛馬內選臚壯者給付
一切事務令尚書圖納會同該總督巡撫提督等公商

料理毋致有誤提督李林隆速往甘州駐扎酌量徵調官兵加意防守地方速檄知之

二月甲午

上諭領侍衛內大臣等曰前令黑龍江寧古塔盛京立刻備兵各居其地者恐噶爾丹知我三路大兵進剿惶迫東行是以使之預備今視口外來報情形亦有東行之狀著薩布素立刻整備屬下兵馬遠設偵探如有用盛京寧古塔兵之處許彼星速往召總轄調遣其左近蒙

古亦當小心防備因薩布素所居懸隔恐報京聲息不
得聞知可將凡屬噶爾丹之事口外報文一一查開月
日發與薩布素知之以便準備行事盛京寧古塔將軍
處亦著檄知

甲辰

上諭禮部兵部朕統御中外念切撫綏惟務休養民生未
嘗遠事征討比年以來海宇昇平閭閻樂業四方固已
無事獨厄魯特噶爾丹荒裔狡寇肆逞兇頑自烏闌布

通敗遁之後不自悔禍仍行狂逞悖天虐衆違蔑誓言
侵掠我臣服之喀爾喀潛入巴顏烏闌之地心懷叵測
逆狀已彰乘其竄伏近邊自應及時撲勦倘目今不行
翦滅恐致異日沿邊防戍益累兵民聲罪迅討事不容
已用是遣發各路大兵分道並進朕特躬蒞邊外相機
行事以衆擊寡以正誅逆天意人謀無不允協此寇一
殄則邊塵蕩滌疆圉輯寧內安外攘實在此舉告祭

天地

宗廟

社稷並一切應行事宜著察例詳議具奏

甲寅

上諭議政大臣等曰朕親統六師前進法律須極嚴明師
行之日軍士俱先於郊次排列俟朕啓行後仍復入城
按日逐旗而出務必隊伍嚴整夸蘭大叅領等各率本
營行裝按隊伍前進不得分散錯亂倘馬驚人墮致失
馬匹者令該夸蘭大章京及護軍校等親往尋獲中路

軍雖行尚俟西路消息倘值天雨即令駐扎其後隊不必等候傳示亦行屯駐凡一應細事該營之皇子及諸王大臣夸蘭大等公同結案事關重大再行請旨凡遇敵兵令我軍攻擊朕必詳審可攻之處始令前進必不以軍士軀命為嘗試如臨陣遇敵不能奮勇敗賊必治以罪前行之前鋒倘望見敵兵必視有水草處駐扎以俟後隊軍至可通行曉諭八旗

四月己丑員外郎席保住奏報侍衛克什圖主事

保住奉使至噶爾丹所噶爾丹授之奏章令步行
而回

上曰朕熟計噶爾丹情形久矣噶爾丹之心必以為今當
春令馬匹羸瘦此路既無水草沙磧瀚海又甚難行大
兵勢不能到至朕親來彼萬難料及故奪我使之馬駝
令步行而回不過欲堅彼部下蒙古之心示以不懼耳
非欲使我兵遲延彼得遠遁也朕先傳諭大將軍費揚
古與約師期今費揚古奏本月二十四日可至土喇若

依期而至兩路夾攻則噶爾丹在我掌握安能復脫若
我兵先到彼必連夜逃遁費揚古兵縱少遲緩必至土
喇地方噶爾丹以疲敝乍到之兵費揚古迎擊可盡行
殲滅觀彼在我使者之前舉動噶爾丹早已入我計中
矣

戊戌

上諭撫遠大將軍費揚古曰朕所統軍將至汛界時即差
護軍叅領車克楚前鋒侍衛祁薩木往克魯倫左側躡

探聲息今車克楚等還奏云臣等初九日到伊扎爾地方見有寇踪於是轉回初十日遇沙津王所差鄂齊爾等言噶爾丹於本月初間自土喇向克魯倫移營第三日我等歸噶爾丹在達爾漢敖拉山以此揆之噶爾丹已近朕所統大軍矣此寇乃極狡猾之人如敗遁斷不趨土喇必渡克魯倫河或從俄儂巴爾濟赴塞稜格或繞巴顏烏闌之後設伏爾等兩隊兵見彼下克魯倫若隨踪而往未必不入其伏兵之中朕甚慮之特遣藍翎

侍衛殷濟納等諭爾可詳詢地里及彼脫逃之路小心堵禦不可以彼向下流行而輕之特諭

己亥

上諭議政大臣等曰噶爾丹由克魯倫河順流已至伊渣爾厄爾幾納克地方我西來兩路兵及中路兵俱近克魯倫河矣噶爾丹勢蹙或向東竄入亦未可知著盛京寧古塔兵前往索岳爾濟山屯扎黑龍江兵亦赴彼會齊可速檄行

五月己未

上賜敕諭噶爾丹曰朕統御萬邦惟以民命為重不喜殺
伐爾厄魯特喀爾喀向奉職貢爾等交惡構兵以來朕
未嘗徧徇而於爾有異視喀爾喀為爾所敗投朕乞命
如朕不救之則皆饑斃矣朕之濟人非特於喀爾喀如
此也凡諸國窘迫來歸者朕亦一體救之已明諭爾數
次爾奏章來索喀爾喀澤卜尊丹巴胡土克圖土謝圖
汗言之不已朕始終不以喀爾喀為直曾諭爾此事非

懸議所能結當會盟以講之爾又以生計窘乏不能前來又以誓書所無之言屢向我使臣喇嘛支吾回奏阿喇尼巡行邊塞猝遇爾兵不待朕旨遂與爾戰因特遣王與皇子與爾會議爾屬下人又先抗拒以致交兵其時所發他路之兵朕急遣人止之勿與爾戰爾前年至巴顏烏闌遂掠喀爾喀之納木扎爾陀音朕又特遣使問故約與議盟今朕與爾若不覲面定議不但爾國難存而我邊民亦不得寧居因爾來既近故秣馬繕備朕

於三月初旬起行西路兵於二月十八日起行黑龍江
兵於四月初六日起行盛京寧古塔兵於三月起行今
朕大軍已出汛界與爾逼近西路兵俱已到土喇河東
路兵俱已溯克魯倫河而來朕向崇禮義順天理而行
不恃勢力戕滅他人朕果恃勢力則竟不遣使統各路
之兵而勦滅爾無所不可朕乃不忍生靈橫被鋒鏑是
以抒誠遣使朕與爾等覲面定議指示地界爾照舊貢
獻貿易則爾國安生而我邊民亦安乃協朕保列國如

赤子之意豈不休歟朕斷不以計誘人切勿疑畏朕來
欲與各處將帥閱兵已傳令伊等勿戰非虛言也爾如
不信可畱朕所遣使臣內一人在爾地倘各處兵進而
攻爾爾可差所畱之人止之一面遣爾前曾奉使為朕
所識之人來奏朕統御萬邦豈肯誘人而破滅之爾或
妄動而去則虛朕美意而生靈有不利矣

癸亥

上以克魯倫河為噶爾丹必爭之地乃分布隊伍躬在前

鋒前行於途次率數人登高執圓鏡遠望見東有
額爾德尼拖羅海山西有山麓從巴爾代哈迤邐
接河岸

上諭科爾沁土謝圖親王沙津達爾漢親王班第喀爾喀
車臣汗納木扎爾王西第什里貝勒盆楚克貝子曰爾
等各率爾屬下蒙古十許人往據西方巴爾代哈山麓
高處佯作全軍從此經行之狀敵人來犯勿與之戰誘
之前來敵若有備則大兵爭先據河是日

駕抵克魯倫河

諭各隊領軍大臣曰噶爾丹若據克魯倫河我兵奪河交戰猶稍費力今觀其不於此拒戰而竟逃竄是自開門戶以與我也除此地外他處斷不能拒我軍審其情形必連夜逃遁矣當輕騎急追之

乙丑

上遣大喇嘛垂喇克查木蘇格隆齋

敕往諭噶爾丹

敕曰朕惟治道原期有益羣生朕親統大兵欲與爾共議
俾羣生享其利益故至此與爾相近處兩次遣使其到
否未知爾何竟無一次遣人來也朕為天下大一統之
主不肯罔人而行已經屢頒諭旨爾仍不信逃遁而去
兵仗器皿盡皆拋棄爾所屬之人乞降而來者甚多爾
生計迫蹙朕所甚悉爾前此無禮於朕使臣朕皆不介
意將爾遺棄疾病之人與來歸之人盡皆收養朕若存
嗜殺之心豈肯收養爾所屬之人爾仍不信遁去今西

路大兵已至巴顏烏闌朕親統大兵至克魯倫河黑龍
江盛京寧古塔等處大兵皆會集於克魯倫河又斷爾
歸路之大兵亦已至厄嫩巴爾查地方爾即欲遁去安
可得乎朕不忍生靈之塗炭故復遣使前來並不欲將
爾勦滅出自至誠爾試反覆思之若仍照舊職貢而來
歸順可於丹濟拉丹津俄木布阿拉布坦三人中速遣
一人來特諭

丁卯

上諭議政大臣等曰噶爾丹亡命奔逃量已至巴顏烏蘭
矣若我全軍追趕似不能及應選兵輕騎追逐除喀瓦
爾達所領前鋒二百外其餘前鋒盡行派出滿洲火器
營兵及親隨護軍亦盡派出著追至巴顏烏蘭過巴顏
烏蘭以北不必前往諸王等所屬之人若自有二十日
口糧不用官糧亦令同往其同回之兵但留其至拖陵
所需五日之糧將餘糧著各旗大臣親驗給與前進兵

丁

辛未

上諭大將軍費揚古曰爾於十三日擊敗厄魯特噶爾丹之事據厄魯特降人奔第來告朕甚慰悅自五月初八日朕先士卒疾追五日噶爾丹窘迫拋棄器械甲冑鍋釜帳房等物及羸病幼小乘夜遁竄朕親率大兵追至拖諾山再欲往追因爾各路兵會合不遠兩軍既會需米甚多恐至缺乏糧餉關係重大量此窮寇以爾兵自西而來此處又發兵夾攻即可勦滅於是朕統大兵回

迎糧米以內大臣馬思喀為大將軍授之大兵湊給二十日糧隨以帶來牛羊遣繼爾後又趙運爾路兵糧留內大臣明珠於克勒河朔地方料理朕又給發馬駝充運糧之用交與明珠將見到米糧陸續運至爾軍運到汎界米糧甚多爾還師時由朕所行之路而來則米糧不致缺乏也

癸酉撫遠大將軍伯費揚古奏捷大學士伊桑阿張玉書恭捧諸王大臣文武官員慶賀表入奏

上曰朕為中外生民之主綏輯海宇愛養元元惟以率土
乂安為念厄魯特噶爾丹擾亂邊塞心懷狡謀逆天虐
民不容不行勦滅朕親統大軍遠出塞外聲討有罪噶
爾丹聞風遁走希圖倖脫適與西路大兵相遇大將軍
費揚古等奮勇力戰大敗賊衆擒斬無算盡獲其人口
牲畜從此邊境寧謐不煩遠事征討四海蒼生可共享
昇平之福朕心深切喜悅

丙子

上駐蹕席喇布里圖畱牧汎界蒙古王等行慶賀禮

上諭曰爾等意中曾料朕此行可直抵克魯倫立奏大功而還如是之速乎朕尊為天子富有四海此番出征朕日食一餐夙興夜寐櫛風沐雨每至一處朕皆步行及聞噶爾丹確信朕親率前鋒窮追凡此特欲速滅兇寇使爾等咸得安生故耳今噶爾丹已滅不但爾等永無侵擾之虞得享昇平之樂朕亦不復為爾憂勞矣

庚辰

上駐蹕塔爾奇喇賜留牧蒙古諸王貝勒貝子台吉等宴
及白金喀爾喀妻子老幼齊集

行宮東門叩謝再造之恩

上諭曰朕君臨天下統御萬邦本無分於內外即海隅荒
陬皆吾赤子一體眷念厄魯特噶爾丹逆天肆虐恃強
凌弱擄掠喀爾喀等國朕不辭勞瘁親統大兵征伐勦
滅今厄魯特之禍靖則朔方永清矣爾七旗喀爾喀自
今以後各自樂業圖報國恩以副朕家視天下之至意

六月乙未

上諭大學士等曰此番出征地方形勢守亦可戰亦可但得天時甚難兵旱出則天寒無草乏水兵不能行遲出則天暑雨水多倘連日霪雨則樵採不敷必致窘乏此番兵出遇無水之地而得水無草之地而草生寒暑俱調此特

上天眷祐故滅寇而成大功竝非人力之所能也其以是傳諭九卿

八月甲午

上賜敕諭策妄阿喇布坦曰朕統御寰區遐邇一體仁育萬民皆欲使之共享安樂朕躬為一統之主懷保萬方獎善良懲凶逆未嘗或爽先是爾陳奏噶爾丹之狡詐與侵害爾之實情誠心懇請眷恤朕嘉爾恭順全受爾之貢獻且以噶爾丹狂悖不靖闖入烏闌布通為朕偏師所敗跪誓於威靈佛前後又背誓害我使臣掠喀爾喀阻止班禪胡土克圖之來又至巴顏烏闌將為禍亂

其意顯露因發三路大兵勦殺噶爾丹諸事降敕詳諭
矣朕親統中路大兵近逼噶爾丹即欲率大兵勦滅之
又不忍衆生橫罹鋒鏑是以暫停撲勦遣諭噶爾丹使
來會盟定議喀爾喀之事爾勿疑懼朕躬俟使臣覆奏
遡克魯倫河而上噶爾丹聞之心膽俱裂棄其子女廬
帳釜鑪什物遁去遇朕所遣堵截西路大將軍費揚古
兵於特勒爾濟之地噶爾丹即來戰大兵乃進擊之噶
爾丹不得旋踵遂大敗斬噶爾丹之妻阿奴及厄魯特

二千餘人丹巴哈什哈察罕西達里哈什哈等人二千餘俱降盡獲其人口馬駝牛羊廬帳什物噶爾丹丹濟拉丹津俄木布阿拉布坦等紛紛潰遁噶爾丹今已困窮矣爾向誠心肫篤請安進貢不絕於道與噶爾丹有不共戴天之讐噶爾丹窮兇極惡不可留於人世一刻尚存即為生民之不利務必勦除以安厄魯特蒙古之生今或流行爾屬下厄魯特地方或奔往哈密地方如生擒噶爾丹則擒之來殺之則以其首來如此則爾向

來恭順之心益著而朕眷顧之恩益無窮矣

九月辛酉

上諭戶部尚書馬齊兵部尚書凱音布等曰噶爾丹窘迫已極近朕差阿南達以巴圖爾額爾克濟農之兵堵禦其外恐噶爾丹乘虛往巴圖爾額爾克濟農行劫爾兩部檄總兵官王化行如噶爾丹往彼處即率其兵往援并諭巴圖爾額爾克濟農知之

己巳撫遠大將軍伯費揚古遣郎中本什同卓力

克圖押護丹濟拉所遣察哈代等入奏

上賜敕諭費揚古曰丹濟拉雖云投降而噶爾丹之奏未
至然彼雖不投降破敗已極如或來降大將軍可善言
慰導令至歸化城其時相與籌度措置特易易耳今自
丹濟拉以下凡所遣人至奏聞送至朕所噶爾丹若遣
使來爾即與言爾等若往奏而歸時愈寒冽必致凍斃
爾可即歸令噶爾丹來降其時我為爾奏懇我主亦不
拂我言也此等情事一面奏聞一面更加周防其周防

事宜馬匹最為緊要朕在軍中見我軍之勇健無可訾
議而於防護馬匹最覺踈虞萬一詐稱投降夤夜乘我
不備驅馬以出所繫匪輕爾諳練行間事多閱歷聊以
朕意念所及書以諭焉朕一聞噶爾丹信息即以在京
豫養之馬令軍士騎乘朕躬於九月十九日起程前往
歸化城此際常須奏聞情勢為佳朕心喜悅欲亟聞彼
中實音為此特諭

壬午

上諭內大臣蘇爾達等曰據厄魯特降人言噶爾丹往博羅烏納罕空津扎巴哈等處地方度冬令丹濟拉往就之所云博羅烏納罕者乃扎薩克圖汗舊居之地距汛界有四十餘日之程大將軍費揚古進兵之時右衛兵每人乘馬一匹以驢騾負裝其廐亦瘦料斷不能到噶爾丹所在之地必自翁金等處因馬瘦而還則徒勞無益朕所以使大同養馬者正欲探實噶爾丹所在如立刻可行則於黑龍江六百兵內選前鋒二百新滿洲四

百察哈爾兵一千全用肥健馬駝充足米糧進剿乘其窮困可一舉滅之噶爾丹業已盡破今我何故不深算剿滅之策而徒勞人馬乎今速檄大將軍費揚古不必進兵至來年青草萌時秣馬以待視噶爾丹所往剿而除之此際當頻遣厄魯特降人招撫為要

十月甲申朔

上問喀爾喀多羅郡王塞稜阿海等喀爾喀厄魯特構兵之由

顧諸王大臣曰今日喀爾喀厄魯特皆在朕直論其事彼皆向來貢獻本朝之國兩國交惡其曲不在厄魯特而在喀爾喀喀爾喀先犯厄魯特喀爾喀理屈是以其國為厄魯特所破但厄魯特假伐喀爾喀為名進我境內烏闌布通之地為我師所敗已誓不復侵喀爾喀矣今又背誓入犯我汎界屯於克魯倫之地則厄魯特理曲是以朕親統六師滅之天道昭然毫髮不爽朕為天下萬國之主寧有偏徇之理乎朕所以破厄魯特者非為

喀爾喀也喀爾喀王及厄魯特降人皆跪奏曰蒙

皇上申明大義方知兩國致敗之由實我等所自取也

甲辰先是昭莫多之捷有厄魯特曼濟受傷被擒
至是曼濟以其妻子在噶爾丹所求歸

上命遣之至大將軍費揚古處偕阿旺丹津齎

敕諭噶爾丹丹濟拉等

敕曰朕統御天下要以中外一體為務往者烏闌布通之
役爾等雖經敗北朕尚欲與爾等會約以定喀爾喀之

事故使命屢頒爾等乃違棄誓言搶掠納木扎爾陀音
竟至克魯倫地方朕親率師欲與爾會同定議遣使申
諭爾復狐疑不信不親見朕使及朕至克魯倫爾遂望
風奔潰遇朕西路之兵爾先犯我顏行遂至喪兵敗衄
盡棄駝馬牛羊子女廬帳什物爾衆寨桑台吉等接踵
來降丹濟拉格壘沽英車陵奔等寨桑十五人亦願歸
服遣察罕哈什漢來陳奏悃誠朕已面諭遣還今朕又
親率六師遠莅於此且各處調兵邀截爾等妻子馬畜

諸物俱已散亡衣食已盡勢迫無歸況時漸嚴寒朕不忍爾屬下厄魯特妻子相失窮困凍饑而死特遣諭招撫今重複降敕爾等若悔前愆俯首向化朕一體加恩撫恤俾各得所爾部下厄魯特亦得妻子完聚咸獲生全朕斷不念爾舊惡況爾部落人內有被我軍所俘其父母妻子尚在爾處不忍分離願歸故土者朕皆恩賚賜之坐騎糗糧即令遣歸使其骨肉完聚其欲內附不願歸者朕皆富貴之各得生養爾部人曼濟重傷為

我軍所擒今曼濟言其妻子尚在爾處因欲告歸朕是以給之恩賞賜以坐騎糗糧使齎救遣回爾地爾等思尚能永存有能收養爾等之人否其熟籌之今已無所歸爾等可速領餘衆抒誠歸順朕必令爾等家富身榮各遂生養惜此厄魯特如許生靈被爾驅迫至於此極今若又不覺悟聽信匪言則後悔莫追矣爾其勿疑勿懼特諭

已酉

上命和碩扎薩克圖親王長史馬尼圖等齎

敕招撫厄魯特阿拉布坦丹津俄木布曰朕統御天下撫恤黎元務使人人各得其所先是爾厄魯特與喀爾喀互相讐怨朕欲爾等和好已頒敕諭喀爾喀厄魯特俱違朕諭自起戰爭喀爾喀既敗來歸朕為天下元后不忍坐視其滅亡於是納之注其名籍酌量封為王貝勒貝子公扎薩克與以厚祿咸致富貴俾各得所噶爾丹乃不願朕拯救天下生靈借喀爾喀為兵端闌入烏闌

布通之地既被我兵所敗雖詭誓遁逃朕猶數遣使頒諭令其會約以定喀爾喀之事噶爾丹違背誓言掠納木扎爾陀音越克魯倫而前朕親統大軍欲與會約特遣使往告噶爾丹狐疑不信不與一見及朕親至克魯倫即望風敗遁遇朕西路官兵彼先逆戰遂至大敗子女牲畜盡被俘獲丹巴哈什哈等先來抒誠後沙克朱木等接踵歸附俱給以官職令其貴顯足其衣食使之富有固已各得其所其來降之衆內有子女被我兵所

俘者皆行察出令其父子兄弟夫婦完聚今朕又親統
六師各路皆已調兵阻截噶爾丹倘不來降必窮之於
其所往爾阿拉布坦丹津俄木布前雖附噶爾丹然皆
非倡亂之人今歸降之人皆云爾等與噶爾丹分析各
居朕嘉爾猶知天道能自振拔憐爾之馬畜等物散失
衣食已絕特遣和碩扎薩克圖親王之長史馬尼圖多
羅郡王昆都倫博碩克圖之烏勒木濟多羅郡王墨爾
根濟農之阿玉西又爾屬下之喇嘛羅卜藏班珠兒亦

願招安爾等今同持諭前往其扎薩克圖汗之子先經
離散朕已收留覓爾岳母令與相會封為親王食以厚
祿頻加撫恤頃又賜以牛羊馬羣擇地令其遊牧使之
得安生業享有富貴此顯然之明驗也敕書一到著即
率爾部落來降前此依附噶爾丹之咎朕概不介意必
待爾以富貴顯榮爾之部落亦使各得生業妻子完聚
從容度日丹巴哈什哈等朕尚憐恤使之富貴況爾等
乎若爾尚有疑懼今春策妄阿喇布坦之使來時稱爾

與策妄阿喇布坦甚善皇上若減噶爾丹請勿討阿拉
布坦令其與我會合等語且策妄阿喇布坦屢遣使納
貢敬慎有加故朕亦深加憐恤爾若同丹津俄木布往
附策妄阿喇布坦處朕亦不窮詰爾其向朕使明白回
奏倘於此二者不審一自處徼倖於厄克阿拉爾空汗
洛齊斯希等處棲身苟免朕斷不姑容必會同策妄阿
喇布坦根敦戴青貝勒等剋期進討爾其早作良圖特
諭

十一月乙丑

上諭議政大臣等曰視厄魯特人攜妻子來降則噶爾丹窮困已極但噶爾丹乃極狡之賊恐彼不得已來降乘我兵不戒竊奪零散喀爾喀財物逸去應著侍郎滿丕郎中桑格前往善巴王汛界地方駐扎不時差人出汛界外偵探如有聲息即收喀爾喀入汛界內越大將軍營安插一面星速馳報前已有文檄知令滿丕等到彼後口傳旨諭大將軍費揚古可也

丙寅撫遠大將軍伯費揚古奏請調太原滿兵署
撫標下騎兵共一千及大同殺虎口未出征騎兵
五百速赴軍前

上諭費揚古曰太原府兵未嫻行陣且至歸化城殆將千
里其綠旗兵止各乘一騎值此嚴寒即得到已不自支
緩急用之必至悞事今撥火器護軍一千礮手二百四
十前鋒二百六十共足爾所調一千五百之數為爾豫
備目前馬甚肥衣亦厚此係隨朕親兵故極嫻熟朝聞

信息晚即可行朕暫駐蹕於此俟噶爾丹實信今若來降即星速遣至行在如有噶爾丹來降之信若不速撤汛界外喀爾喀信其降而坐待之則悞大事不淺矣近來丹濟拉差人請降而又來襲糧餉可為明鑒今不得復悞當益詳慎遠慮可也

戊寅噶爾丹之使格壘沽英至

上命之近前

諭曰朕為天下之元后萬國一家今日科爾沁諸王貝勒

台吉及喀爾喀厄魯特皆在此朕當公言之喀爾喀厄魯特向皆職貢本朝之國朕初無偏徇喀爾喀土謝圖汗執喀爾喀扎薩克圖汗而殺之又殺爾主噶爾丹之弟其曲實在喀爾喀後喀爾喀為爾國所敗前來歸朕朕憐彼十萬餘身命失其生路受而養之凡有人窮迫來歸者朕皆收養無分彼此不但喀爾喀即爾厄魯特今為敵國有來降之人朕皆軫恤各使得生路量材授之官職雖被俘擄之人皆贖還其妻子完彼骨肉朕豈

以喀爾喀厄魯特有異視乎前以噶爾丹無故闌入我
汛界侵內地蒙古朕遣兵敗之於烏闌布通之地爾主
噶爾丹窘極遁逃立誓不復犯汛界朕向以至誠待人
故不遣兵窮追爾主噶爾丹逆天背誓離其故巢竊伏
克魯倫地方侵掠納木扎爾陀音朕不得已統兵出塞
然仍再三遣使約噶爾丹會盟修好此朕不嗜殺人之
心爾主不自引罪朕始整兵進討噶爾丹不能抗我軍
威日夜奔逃適遇我西路豫堵之兵亦係噶爾丹先犯

我軍故我師乃進戰大敗之爾今窮困至此極者皆爾等自取非朕欲陵之也爾既奉使而來第公言之毋隱格壘沽英初與諸大臣言猶支吾巧辨及聞

皇上諭旨傾心悅服叩首奏曰誠天下之

聖主也

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷十七。